

## In Ehredinge

Jetz wohn i au scho mängs Jöhrli da  
han mich da fascht scho chli niderglaa  
känne dä Lade und d'Poscht und d'Schuel und dä Pfarrer  
känne d'Wäge und d'Strasse und dä Schneepfluegfahrer  
hocke ab und zue inere Beiz am runde Tisch  
rede mit, über dises und über anders was isch  
bi au scho i mängem Verein debii  
ich säge „mis Dorf“ als wär's immer so gsii

ja so grad isches g'sii  
bin au mit debii  
ich bi froh in Ehredinge z'sii

Ich känne do scho mänges Gsicht  
ich känne do scho mängi Gschicht  
känne Froid und Leid,  
känne Striit und Froid,  
känne da fascht jedes Huus  
au bim Gmeindsbüechli chum'i langsam druus

so bin i debii  
bin au mit debii  
ja ich bin froh än Ehredinger z'sii

Und du? Spillsch villicht gärn Musig  
Trompete oder Bass,  
oder bisch villicht sportlich,  
bisch im Tschutte äs Ass,  
Villicht tuesch gern walke  
über Shtock und Stei,  
oder lieber gern jasse,  
i de Beiz oder dihei,  
Oder bisch gschickt im Chüngel-Züchte  
oder im schöni Bluemegsteck richte  
- mach mit im'ne Verein  
mach irgendwo mit  
wo'd anderi Lüüt triffsch,  
wo's Spass und Erholig und Erfahrig git!

ja gib di drii,  
so bisch au debii,  
bisch froh än aktive Ehredinge z'sii.

Villicht tuesch aber gern diskutiere  
oder häsch s'Talänt zum politisiere  
gesech das und s'ander wo me besser sött mache  
Finanze oder Schuel oder andere Sache  
chasch argumentiere inere Kommission  
und überzüüge für dini Position

ja gib di drii,  
das würd's doch sii,  
än engagierte Ehredinger z'sii.

Villicht aber stinkt's der's, findsch alles denäbe  
machscht d'Fuscht im Sack, dänksch alls sig vergäbe  
findsch das seig nur äs Kaff ohni Ideen und Pfiff  
die da obe, die händ doch eifach nüüt im Griff . .

ja so cha's au sii  
so schick di drii  
halt au än Ehredinger z'sii

Ja mängisch da dunkt's eim sig alles verstaubt und verhocket  
verchruschtet, verfilzt, verhanget, verstocket  
stuuri Grinde, stuuri Chöpf  
die alte Striit, die alte Zöpf,

dänn lahn i's la sii  
fühl mi gar nöd debii  
was söll ich in Ehredinge sii

Sig's - wohnsch du au scho paar Jöhrli da  
häsch di fascht scho chli niderglaa  
kännsch dä Lade und d'Poscht und d'Schuel und dä Pfarrer  
kännsch d'Wäge und d'Strasse und dä Schneepfluegfahrer  
hocks ab und zue inere Beiz am runde Tisch  
redscht mit, über dises und über anders was isch  
bisch au scho i mängem Verein debii  
und seisch „mis Dorf“ als wär's immer so gsii

ja gib di drii,  
so bisch au debii,  
bisch froh in Ehredinge z'sii